

Carta Cha Sacuhun Ra Apóstol Pablo Chi Ñáyivi Ñuu Filipos Cha Yihí Cuenda Nyoo

Ñohó ra Pablo vehe caa, ta tyaá ra noo carta chi ñu yihí cuenda Nyoo ñuu Filipos

1 Yuhu ra Pablo ta ra Timoteo sacuví ndi tyiño nuu ra Jesucristo. Ta tyaá ndi carta ihya chi tandihí ndo cha cuví ndo ñu ñuu Filipos cha yihí cuenda Nyoo. Ta chi ra cayihí ndaha vehe ñuhu, ta chi ra canyehe tyiño vehe ñuhu, ta chi tandihí ndo. ²Na nasoco Nyoo Sutu yo ta Sutu Mañi yo Jesucristo chi ndo. Ta nacuhva ra cha taxi ri coo ánimo ndo.

Nu chicán tahvi ra Pablo chaha ñu yihí cuenda Nyoo ñuu Filipos

³Tahan ri cha nichohón iñi chi ndo, nacuhvá xain tyahvi nyoo chi Nyoo cha cuenda ndo. ⁴Ta chicán tahvi chi Nyoo cha cuenda ndo chihin cha sii cuñí ñime. ⁵Vatyi nyata quivi xihna ri cha chiñi ndo tuhun ra Cristo ta nya vityin ta ña sandihí ndo tuhun cha tyinyeé ndo chii. Vatyi ñin ri tuhun ra Jesucristo sacotó yo chi ñáyivi. ⁶Quivi naquehen cuenda Nyoo

ánima ndo, maa ra chaha tunyee iñi chi ndo, na sacuvi ndo tyiño nuu ra. Ta chité tyi tyicuan ri cuacuhva ra chi ndo nyacua nya quivi quichi ra Cristo inga chaha. ⁷Tahán chi cha caca xiñi tyehe caa cha cuenda ndo, vatyi cuñí xain chi ndo. Vatyi ñin ri nasocó Nyoo chi yo. Vasi ñohí vehe caa, o vasi nanyaí nuu ra cuví tyiño, soco sacoté tuhun Nyoo chi ra canyicú vehe caa ihya, ta chi ra cuví tyiño, na cacoto ra tyi ndicha tuhun ra Cristo. ⁸Nyoo chitó ra vatyi cuñí xain chi tandihí nyoho tari cuñí ra Jesucristo chi ndo. ⁹Ta chicán tahvi xain chi Nyoo na cuvita ca iñi ndo, ta cuñi ca ndo chi ñáyivi. Ta suri coo ca cha chiñi tuñi Nyoo chi ndo, ¹⁰tacuhva vatyi tyicuan ri coto ndo nacachi ndo cha vaha ca. Ta tyicuan caa ta cachi coo ndo ta ma coo ca cuatyi ndo quivi quichi ra Cristo. ¹¹Maa ra cutyinyee ra chi ndo. Ta tyicuan ri cusacuvi ndo maa maa ri cha vaha, ta cha ndaa. Tyicuan caa ta cusacahnu ñáyivi chi Nyoo tyi cahnu xaan ca cuví maa ra ta sacuví ra tyicuan caa chihin ndo.

Maa maa ri tyiño Nyoo sacuví ra Pablo vatyí ñohó ra Cristo añima ra

¹²Ta cuñí tyi coto ndo yañi vatyí tandihí cha cuví chii tyinyeé xaan chí chii nu cahín tuhun Nyoo chihin ñáyivi. ¹³Vatyí chitó tandihí sindaro vehe rey ta tandihí inga ñáyivi ihya vatyí ñohí vehe caa cha cuenda cha nyiquén chí ra Cristo. ¹⁴Ta cuaha xaan ra yañi yo cuenda Sutu Mañi yo cunií ca ñi ra cha cuenda cha ñohí vehe caa. Ta naá cha yuhvi ra vatyí cachitó ra vatyí tyinyeé Nyoo chí yo. Ta ñihi ca cacahán ra tuhun Nyoo chihin ñáyivi.

¹⁵Ta ndicha vatyí yihí ra, cahán ra tuhun ra Cristo soco cha cuenda cha tasi cuñí ra nyehé ra chii, o cuñí ra na cunyicon ñáyivi chí ra. Soco yihí ra cahán ra tuhun ra Cristo chihin ñáyivi, soco chihin cha vaha chicá xiñi ra. ¹⁶Yihí ra cacahán ra tuhun ra Cristo cha cuenda cha cuñí ra chí ra. Vatyí chitó ra vatyí maa Sutu Mañi yo quichi nyaca ra chí ihya. Vatyí cotyiño ra chí, ta sacoté chí ñáyivi tyi ndicha cha sacacú ra añima yo. ¹⁷Soco inga ra cuan ñima cha ñi ñi ra cahán ra tuhun ra Cristo, soco cuñí ra cuhva ra tisihi chí nu ñohí vehe caa ihya. ¹⁸Soco cha cuenda chí yuhu ñahri saha, vasi sacuví ra chihin cha vaha chicá xiñi ra o chihin cha ña vaha. Soco tuhun ra Cristo ican casacotó ra. Ta sií xaan cuñí cha cuenda cuan.

¹⁹Ta cusii ca ñi vatyí chité vatyí chichi cha tandihí cha cuví chii, Nyoo cuasacacu ra chí. Tyahvi nyoo chí Nyoo vatyí chicán tahvi

xaan nyoho cha cuende nuu Nyoo. Ta tyinyeé xaan Tatyí Ii ra Cristo chí. ²⁰Chitó vahi vatyí Nyoo cutyinyee ra chí cha ma cucahan nui, ta ma yuhvi cahín chihin cha ní ñi tuhun ra Cristo. Ñahri cuende, an coo que ñáyivi, an cúvi, soco cuñí vatyí vityin ta ityi nuu ca saha ñáyivi cuenda cuhva iyé ta coto ñu tyi ra Cristo cahnu ca cuví ra. ²¹Vatyí cha cuenda yuhu tatu iyé, sacuvi tyiño nuu ra Cristo ihya siquí ñuhu ñáyivi. Soco tatu cúvi, cuñihi cha tyaquí cha iyó andivi. ²²Soco tatu iyó que, vaha xaan. Vatyí sahá tyiño que cha cuenda cha vaha maa Sutu Mañi yo. Yucuan chaha ña chité nya ityi cuhin, an cuhin ityi andivi, an cuhin cucahan que tuhun Nyoo chihin ñáyivi, ña chité. ²³Yii xaan cote nya cha cuñí, vatyí iyó quivi cuñí cha coo que. Soco iyó quivi ña cuñí. Vatyí cha cuñí cunuhi cucunyai chihin ra Cristo. Vatyí vaha ca cuan. ²⁴Soco cha cuenda cha vaha chí nyoho, vaha ca cha ndoí chihin ndo. ²⁵Yucuan chaha chité vatyí cundoi suhva ca ñáyivi ihya. Vatyí cuñí chí cha tyinyeé que chí ndo tacuhva cuví cuhun ca ndo ityi nuu ca ta cu sií cuñí ndo chihin cha chinó ñi ndo chí Nyoo. ²⁶Ta quivi cunyehe nu nyicu ndo, tyicuan caa ta cuví cusii ca ñi yo cha ñi ri cuví yo chihin ra Cristo.

²⁷Cuñí chí cha coo yo yoso cuhva tahán chí coo noo ñu yihí cuenda Nyoo. Vasi nyaí chihin ndo, o cañi nyaí, soco cuñí cote tuhun ndo vatyí nyoho vaha cuahan ndo chihin Nyoo. Ta ñi ri sahá tyiño ndo tacuhva nachino ñi ñáyivi

tuhun ra Cristo. ²⁸Ta ma yuhvi ndo ñáá cha sacuví ñu xaan iñi chi ndo cuenda tuhun Nyoo. Vatyí cha tyicuan caa, cachi xaan sañahá chi chi yo vatyí cunaa ñu. Ta sañahá tucu chi chi yo vatyí cha cacú añima yo sahá maa Nyoo. ²⁹Vatyí tari chahá ra Cristo ityi chi yo cha chinó iñi yo chi ra, tyicuan caa tucu chahá ra cha nyehé yo tindoho cha cuenda ra. ³⁰Iñ ri cuhva nyehé yo tindoho ta sacotó yo tuhun ra Cristo, ta cha chitó ndo yoso caa nyehí tindoho, ta vityin suri chitó ndo vatyí ña sañé cha sahá tyiñe tuhun Nyoo.

Tyayii xaan ra Cristo, soco quichi cúvi ra tari noo ra ndahvi

2 Ndicha vatyí ra Cristo saníí xaan ra iñi yo cha iin ri cuví yo chihin ra. Ta vaha cuñí yo cha cuenda cha cuñí ra chi yo. Ta ndicha tucu vatyí nyaá Tatyí Ii Nyoo chihin yo. Ta ndicha tucu cha ndahvi cuñí yo nyehé yo chi tahan yo. ²Tatu ndicha tandihi ihya, cūhva ndo cha cusii cuñí chihin cha iin ri cuví ndo. Ta cuñi ndo chi tahan ndo tari cuñí ra Cristo chi ndo. Ta iin ri cuhva caca xiñi ndo. Ta iin ri cuhva sacuvi ndo. ³Ma sacuvi ndo cha vaha chi maa ri maa ndo, soco sacuvi ndo cha vaha chi ñáyivi ñandihí. Ta ma cahnu saha ndo chi ndo. Ndahvi saha yo chi yo. Ta tahan tahan yo saha yo tuhun vatyí vaha ca inga ñáyivi ta ñima ca maa yo. ⁴Ta tahan tahan yo caca xiñi yo cha cuenda cha vaha chi inga ñáyivi, ta ñima cha vaha chi maa ri maa yo.

⁵Çaca xiñi ndo tari chicá xiñi ra Jesucristo.

⁶Vasí cuví ra Nyoo, soco ña cahnu saha ra chi ra ta ña quichi cuví iñi ra cha sacahnú ñáyivi chi ra, tari sacahnú ñu chi Nyoo Sutu ra.

⁷Soco sandoo ra tandihí tunyee iñi ra ta tandihí cha tyayii ra iin chiyo xiin.

Ta quichi ndahvi ra noo ñáyivi ndahvi quivi cacú ra siqui ñuhu ñáyivi.

⁸Ta ndahvi saha ra chi ra, vatyí ndahvi ra noo rayii ri.

Ta chihin cha iyó vaha iñi ra ta quichaha vaha ra chi Nyoo nyacua chaha ra cha cahni ñáyivi chi ra.

Tari noo ra quiñi iyó saha ñu chi ra, vatyí nu cruzi chihí ra.

⁹Yucuan chaha Nyoo sacahnú xaan ra chi ra.

Ta chahá Nyoo noo sivi chi ra, noo sivi cha cahnu xaan ca cuví nuu tandihí maa sivi.

¹⁰Vatyí tacuhva tatu cuiñi yo sivi ra Jesucristo, tandihí yo ta cuiñi chiti yo. tandihí cha iyó andivi. Ta tandihí cha iyó siqui ñuhu ñáyivi, ta chichi ñuhú, cucuiñi chiti ta sacahnu chi ra.

¹¹Vatyí tandihí cha iyó ta nacoto nuu vatyí ra Jesucristo cuví ra nyacá ñaha chi tandihí maa cha iyó.

Tyicuan caa cunyehe chi tyi cahnu xaan ca cuví maa Nyoo Sutu yo.

Ñu yihí cuenda Nyoo cuví ñu tari noo cha ndichin siqui ñuhu ñáyivi ihya

¹²Yañi, cuñí xain chi ndo. Ta tari cha quichaha ndo chii quivi chinyai chihin ndo, quichaha tucu ndo chii vityin cha cañi nyaí. Ndūcu xaan

ndo cuhva na nyehe ñáyivi tyi ndicha cha sacacú Nyoo chi ndo. Ta s̄aha ndo cuenda cuhva coo ndo chihin ra. ¹³Vatyi maa Nyoo sacacu cha vaha añima ndo. Ta tyinyeé ra chi ndo tacuhva vatyi quichi cuvi iñi ndo quichaha ndo nu cahán ra, ta sacuvi ndo cuhva cuñí ra.

¹⁴Tatu cuasacuvi ndo ñáá cha cuasacuvi ndo, nd̄ucu ndo cuhva cha ma coo tisihi, ta ma cañi tahan ndo. ¹⁵Tyicuan ta ma coo ni noo cuatyí ndo. C̄uvi ndo noo ñáyivi cachi iyó, c̄uvi ndo ñáyivi ñahri cuatyí, tari tahán chi coo ñáyivi cuenda Nyoo mahñu ñáyivi quiñi iyó ihya. Cuñí chi cha cuví ndo tari noo ñuhu cha sandichín nu ñaa iñi siqui ñuhu ñáyivi ihya. ¹⁶Cahan yo tuhun Nyoo chihin ñáyivi vatyi ican cuan chahá ñáyivi chaa cha iyó yo. Sacuvi ndo tyicuan caa, tyicuan ta quivi cuquichi ra Cristo, yuhu vaha coo iñi cha cuenda nyoho, vatyi ña sacot̄o cahi tuhun Nyoo chi ndo. ¹⁷Ta vasi cahñi ñáyivi chi yuhu, cha catyi tuhun Nyoo, soco sii xaan cuñí ta cuñí cusii cuñi ndo chihin vatyi tyicuan caa sacañá tahn cha cucuhva cuenda yo chi Nyoo, cha cuenda cha chinó iñi ndo chi ra. ¹⁸Ta tahán chi cha cusii iñi tucu nyoho chihin yuhu ñandihí.

Nu tachí ra Pablo chi ra Timoteo ta ra Epafrodito nu nyicu ñu yihí cuenda Nyoo ñuu Filipos cuan

¹⁹Tatu Sutu Mañi yo ta cuñí ra cutachi chi ra Timoteo quichi nyehe ra nu nyicú ndo. Ta quivi ndichi ra nu nyaí cucusii xaan cuñi. Vatyi cunacatyí ra chii yoso caa nyicú

ndo. ²⁰Vatyi noo tuhun ri maa ra chicá xiñi ra cha cuenda cha vaha chi maa ndo tari chicá xiñi yuhu. Ta yori yóo ca ra chicá xiñi tyicuan caa. ²¹Vatyi tandihí ca ra, maa maa ri cha cuenda chi maa ra nanducú ra. Ta ña nanducú ra yoso caa cuhva cuñí ra Jesucristo. ²²Chitó ndo vatyi ra Timoteo, vaha cuahan ra chihin Nyoo, ta cha cuenda chi yuhu cuví ra tari noo sehi. Ta tyinyeé xaan ra chii cha cahán ndi tuhun ra Cristo chihin ñáyivi. ²³Ta nyaá sacuhin chi ra nu nyicú ndo. Soco nya coto xihne ñáá catyi ra cuví tyiño, tatu ña naha ca ñohí. ²⁴Vatyi chitó vahi tyi Sutu Mañi yo numi ri cuhva ra cha cuhin cunyehi nu nyicú ndo.

²⁵Ta vaha cha cunuhu ra Epafrodito yañi yo nu nyicu ndo. Tachí ndo chi ra vatyi quichi tyinyee ra chii nu tyiño sahí. Ta tíñ tahan xaan ndi chihin ra ña vaha cha cuví ndi sindaro ra Cristo. ²⁶Ta cuñí xaan ra Epafrodito cunuhu ra nu nyicú ndo, vatyi chicá xaan xiñi ra cha chitó ndo tyi cuhvi ra. ²⁷Vatyi ndicha cuhvi xaan ra ta cha yatyin maa cha cúvi ra. Soco Nyoo cundahvi cuñi ra nyehe chi ra, ta chi yuhu ñandihí. Ta ña chaha ra cha cúvi ra. Ña cuñí ra cha coo ca tucuihya iñi chii. ²⁸Yucuan chaha yuhu cuñí xain cha ndichi ra nu nyicú ndo. Vatyi chité tyi nyoho cundusii xaan cuñi ndo cha nanyehe ndo chi ra. Tyicuan ta ma caca ca xiñi tuhun ndo. Vatyi cha nanyehé ndo chi ra tyi iyó vaha ra. ²⁹Yucuan chaha vaha ñaquehen ndo chi ra chihin cha sii cuñí ndo, vatyi yañi yo cha cuenda maa Sutu

Mañi yo cuví chi ra. Ta tyicuan ri saha ndo ñáyivi chi yañi yo cha iyó tari caa cuhva iyó ra. ³⁰Vatyí cha yatyin maa cha cúvi ra cha cuenda cha sacuví ra tyiño ra Cristo. Soco ña yuhví ra vasi cúvi ra cha cuenda cha tyinyeé ra chii. Vatyí maa ndo ña cuví quichi tyinyee ndo chii vatyí cañi xaan nyicu ndo.

Nu sañahá ra Pablo yoso caa ndu ndii yo nuu Nyoo

3 Ta vityin yañi, cusii iñi ndo chihin Sutu Mañi yo. Cha cuenda chi yuhu ñahri sahá cha cha yaha tyai tuhun ihya chi ndo, cutyaa tiqui inga chaha. Vatyí cha vaha chi maa ndo cuví. ²Saha ndo cuenda chi ndo chihin ra cha quiñi iyó chiña. Nyacuví ra cuhva cuñí ra ña vaha. Vatyí catyí ra tyi cuñí chi sacuvi yo costumbre circuncisión ta cacu yo. ³Soco yoó noo circuncisión cha ndicha savaha Nyoo chi yo. Vatyí maa yo sacahnú yo chi ra chihin Tatyí Ii ra cha ñohó añima yo. Ta cusii cuñí yo vatyí cuenda maa ra Cristo Jesús yihí yo. Ta ña itá iñi yo tyi cacu yo chihin cha sacuví yo costumbre. ⁴Tyehe ta cuví cacu yo chihin cha sacuví yo, yuhu vihi ca caquí cha nuu tandihi ñu sacuví tyicuan caa. ⁵Vatyí uña quivi ta saha ñu circuncidar chii. Vatyí tata ra Israel vachi. Ta tata ra Benjamín sehe ra Israel cuví. Ta tata ñu cahán sahan hebreo cuví. Yucuan chaha yuhu hebreo cuví. Ta siin ri quichaha xain ley chahnu quivi cuan, vatyí fariseo cuví. ⁶Ta cha cuenda cha cuñi quichahi ley, ta chican nyicon xain chi ñu yihí cuenda ra Cristo. Ta ña cuñi nyehi

chi ñu. Ta quichahi tandihi maa ley chahnu, vatyí nducú xain cuhva quichahí nu cahán ley cuan. ⁷Soco tandihi cha cuñi mai vatyí vale xaan quivi cuan, vityin ña vale ca cuan. Vatyí maa ra Cristo cuví ra itá iñi. ⁸Ta siin ri tandihi cha sacuvi, chitó mai vatyí ña vale cha cuenda cha chicohón nui chi ra Cristo Jesús, Sutu Mañi yuhu. Vatyí yucuan cuví cha tyayii xaan ca. Ta cha cuenda ra Cristo tandihi cha sacuvi ta ityi chata ca cuví chi noo cha ñima ri tuhun vityin. Yucuan chaha sandoi iin chiyo xiin tandihi cuan. Vatyí cuñi cohon nuu que chi ra Cristo. ⁹Ta cha cuñi yuhu nacu iin ri que chihin ra. Vaha iyé cha cuenda tyi chinó iñi tyi sacacú ra chi yo. Ñima cha cuenda cha quichahí ley Nyoo ta vaha iyé, soco cha cuenda vatyí chinó iñi tuhun cahán ra, vatyí sacacú ra chi yo. Ta cha cuenda cha chinó ri iñi yo, ra Cristo naquehén cuenda ra chi yo. ¹⁰Cha cohon nuu que chi ra Cristo yucuan cuví cha cuñi. Nyoo sanandoto ra chi ra Cristo chihin tunyee iñi ra. Ta cuñi tyi coo ca tunyee iñi cuan chii. Ta cuñi cunyeí tindoho cha tahán chi nyehí. Ta cuñi cha cúvi tandihi cha ña vaha cha cuñi coño ñuhi, tari chihí ra Cristo cha catyi cuatyí yo. ¹¹Vatyí nanducú xain cuhva cha cunandote noo ñáyivi chaa chihin Nyoo nya andivi.

Cuhun ca yo ityi nuu ca chihin Nyoo

¹²Ñima tyi catyí chi ndo tyi ñahri ca cha cumañi chii, ta vaha xain. Soco cuahin ityi nuu ca. Vatyí cuñi naquehin cha chahá ra Cristo chii.

Vatyi xihna ca maa ra naxita ra chii ityi ra. ¹³Yañi, ña catyí chi ndo tyi cha ñihí tandihí cha vaha cuan. Soco sanaí iñi cha quichi ityi chata. Ta sañihí cuhin ityi nuu ca. ¹⁴Tacuhva tyi chaí nu nyaá cha tahán chi chii. Vatyi caná Nyoo chi yo nya andivi. Vatyi cunaquehen yo cha catyí ra chi yo vatyi cuhva ra cha cuenda cha iin ri cuví yo chihin ra Cristo Jesús.

¹⁵Tyehe caa tahán chi caca xiñi tandihí yo cha ñihí nyaá yo chihin Nyoo. Soco tatu ñima tyehe caa chicá xiñi nya noo nyoho, Nyoo cucuhva ra cha cutuñí iñi ndo.

¹⁶Soco noo ri tyi cuñí chi cha quichahá vaha yo tuhun cha cha yaha sacoto Nyoo chi yo.

¹⁷Yañi, quehen ndo cuhva iyé ta cuhva cahín. Ta saha ndo cuenda chi ñu iyó tari cuhva sañahá ndi chi ndo. ¹⁸Vatyi ticuiti chaha catyí chi ndo, saha ndo cuenda chi ra cuendu. Ta vityin catyí tiqui chi ndo inga chaha chihin cha chaquí cha cuihya iñi, vatyi cuaha xaan ra xaan iñi chi ra Cristo. Vatyi catyí ra tyi noo cha ña niñi xaan cuví cha chihí ra Cristo nu cruzi. ¹⁹Soco quivi quichi tucu ra Cristo, cuhun coyo ra cuan anyaya. Vatyi sacuví ra cuhva cuñí coño ñuhu ra. Ta cahnu sahá ra chi ra chihin cha tahán chi coo ticahan nuu nuu ra. Ta itá iñi ra maa maa ri cha iyó ihya ñayivi ri. ²⁰Soco yoó nya andivi nyaá ñuu yo. Ta suri ityi cuan nyatú yo chi Sutu Mañi yo Jesucristo, ra sacacú chi yo. ²¹Ta cuquehen ra coño ñuhu pehe yo. Ta cusananduvi ra chi yo tari coño ñuhu maa ra. Ta chihin tunyee iñi cha iyó chi ra cha nyacá ñaha ra tandihí, cusacuví ra tyicuan caa.

Tyicuan ri na cusii cuñi yo chihin Sutu Mañi yo

4 Yañi, cuñí chi ndo. Ta cuñí xain nyehi chi ndo. Ta sii xaan cuñí chihin ndo. Ta chité tyi ña cahán cahi tuhun Nyoo chihin ndo. Vatyi níí xaan iñi ndo nycón ndo chi ra. Na cuinyaña ca ndo chi Nyoo chihin cha níí iñi ndo.

²Ta vityin chiquén chi cu Evodia, ta chi cu Síntique, nanduvaha coo ñu chihin tahan ñu. Ta na coo ñu tari cha cuhu ñu cuenda Sutu Mañi yo. ³Yoho, yañi, nií iñun sahá tyiñon chihin, ta chiquén chuun na tyinyeun chi ñu tahan yo ihya. Vatyi tyinyee xaan ñu chii chihin cha sacoto ñu tuhun Nyoo cha cacu añima yo chihin ra Clemente ta suhva ca ñu ñandihí. Ta nyaá sivi ñu nuu tutu Nyoo nya andivi.

⁴Ta tyicuan ri maa cusii iñi ndo chihin Sutu Mañi yo. Ta catyí tiqui chi ndo inga chaha, na cusii iñi ndo chihin ra. ⁵Ta tandihí ñáyivi na nyehe ñu chi nyoho vatyi ndicha noo ñáyivi vaha cuví ndo. Ta nicohon iñi ndo vatyi cha nyaña yatyin quivi quichi Sutu Mañi yo.

⁶Ta ma ndahvi xaan cuñi ndo ñáá ndihí cha cuví chi ndo. Nyita ri nacatyí ndo chi Nyoo ñáá ndihí cha cuví chi ndo. Ta çacan tahvi ndo chi ra ñáá ndihí cha chiñuhú chi ndo. Ta yaha cuan ta nacuhva ndo tyahvi nyoo chi ra. ⁷Ta cha sacuví ndo tyehe caa, Nyoo cuhva ra cha taxi ri coo añima ndo. Ta cahnu xaan ca cha vaha cuví cuan. Ta ni noo ñáyivi ta ña cuví cutuñi iñi ñu yoso cuhva cha cahnu cuan. Ta cha taxi maa Nyoo cusaha cumi

añima ndo ta cha chiñi tuñi xiñi ndo. Vatyí iin ri cuví ndo chihin ra Cristo Jesús.

Na caca xiñi yo maa maa ri cha vaha

⁸Yañi, nu ndihi tuhun caca xiñi ndo maa ri cha ndicha vaha, cha cachi iyó, cha ndoo iyó, cha ndii, cha ñahri cha quiñi caa, cha tyaqui, cha vaha. Caca xiñi ndo maa maa ri maa cha vaha tacuhva cuví sacahnu yo chi Nyoo.

⁹Sacuvi ndo cha sañahi chi ndo. Tuhun cha chiñi ndo cahin, cha nyehe ndo chinyacuví, sacuvi ndo. Ta Nyoo ra chahá cha taxi coo añima yo, cucunyaa ra chihin ndo.

Tyinyeé ñu Filipos chi ra Pablo chihin cha iyó chi ñu

¹⁰Siñi xaan cuñí. Ta sacahní chi Sutu Mañi yo cha cuenda cha tyinyeé ndo chii inga chaha. Ta chité vatyí tyicuan ri cuñí ndo tyinyeé ndo chii. Soco ña chaha chi cuhva chi ndo. ¹¹Ñima tyi catyí chi ndo tyehe caa ta cuñí ndo tyi iyó cha chiñuhú chii, vatyí yuhu cha cutuhve cha cusii cuñí chihin ñáá ri cha iyó chi. ¹²Vatyí yuhu chité yoso caa coo ndahvi ta chité yoso caa coo tyayii. Vatyí cha cutuhve coi chihin cha iyó o chihin cha ñahri cha cachi, o tatu nyacua ndoo ca, o tatu ñahri tucu, ndoi vaha. ¹³Tandíhi ta cuví chasahí vatyí maa ra Cristo cuví ra tyineé chii. ¹⁴Soco nyoho yañi vaha xaan cha tyinyeé ndo chii chihin tindoho cha nyehé xain.

¹⁵Cha chitó nyoho ñu Filipos yoso caa cuví quívi quichaha cahin tuhun Nyoo chihin ndo. Ta quite Macedonia chiña tyi cuasacote tuhun Nyoo inga ñuu. Ta noo tuhun ri nyoho tyinyeé ndo chii chihin xuhun, vatyí vaha xaan cuñí ndo cha cahín tuhun Nyoo chihin ndo. ¹⁶Ta siñi ri cha ni ri ca cha chinyai Tesalónica, cuaha ri chaha tyinyeé ndo chii. ¹⁷Ñima cha chicá xiñi cha cuenda cha cuhva ca ndo chii, soco cha cuñí vatyí nyoho coo ca cha vaha chi ndo nuu Nyoo. ¹⁸Ta vityin cuhva, ñahri cha cumañi chii. Nyacua ndoo ca cha sacuhun ndo chii chihin ra Epafrodito. Ta cha chaha ndo cuan cuacuví chi tari noo xico vixi, xico vaha cha chaá nuu Nyoo. Yucuan cuví cha tahán iñi ra. ¹⁹Ta Nyoo cuhva ra tandíhi cha chiñuhú chi ndo. Cha cuenda ra Cristo cucuhva ra tandíhi cha vaha cha tyayii cha cumí ra nya andívi. ²⁰Chi Nyoo Sutu yo na sacahnu yo tyicuan ri maa. Ta na cuví chi tyicuan caa.

Sacuhún ra Pablo nocumi chi ñu Filipos

²¹Chahí nocumi chi tandíhi ndo cha yihí ndo cuenda ra Cristo chiña. Ta vachi tucu nocumi chi ndo sahá yañi yo cuenda Nyoo cha nyicú chihin ihya. ²²Ta ñáyivi cha nyicú vehe ra nyacá ñaha ñuu Roma ihya, ta tandíhi ca ñu yihí cuenda Nyoo ñuu ihya chahá ñu nocumi chi ndo. ²³Ta na nasoco maa Sutu Mañi yo Jesucristo chi tandíhi ndo. Ta na cuví chi tyicuan caa.